

Oqaasiliortut ataatsimiinnerat

Ataasinngorneq, novembarip 18-ianni 2013, nal. 10.00
Oqaasileriffiup ataatsimiittarfiani.

Peqataasut: *Carl Chr.Olsen, Eva M.Thomassen, Stephen Heilmann, Karl Møller aamma Katti Frederiksen.*

Allatsi: *Katti Frederiksen*

Oqaluuserisassatut siunnersuutit:

1. Tikilluaqqusineq aamma ilisimatitsissutit.

Tikilluaqqusereernerup kingorna ullormut oqaluuserisassat ilaqqinneqalaarput.

Oqaluuserisassat sisamaat tassaalerluni ilinniartitaanermi inatsisissami taaguutit atorineqartut pillugit aalajangigassat.

Oqaluuserisassat tallimaat tassaalerluni SH-p KNR-radiukkut tusaasimasaa ullormut eqqarsaatissiisummi oqaatsivut pillugit kukkusumik nalunaaruteqarsimanerup qisuariarfigineqarnissaanut tunngasoq.

Oqaluuserisassat arfernat tassaalerluni taasariaqartut allat.

a) Oqaasileriffiup nittartagartaarniarnera pillugu Tino Didriksenimik atatsimeeqateqarsimaneq CCO-mit ilisimatitsissutigineqarpoq.

Nassuiaavoq nutserisoqarfik aamma qaninnerusumik suleqatigineqalissasoq, Oqaasiliortut akuerisaat imminnut takuneqarsinnaasunngussasut, digitaliserikkat allallu ordbogitoqqat ilanngullugit nittartakkami nutaami takuneqarsinnaasunngussasut.

b) KF-ip Islandimiissimanerminik nassuiaavoq. Suleqatigiit Islandimiit, nunatsinniit Savalimmiuniit Danmarkimiillu Talehjælpimik taasamik suliaqarnissamik pilersaaruserlutik aallartipput. Talehjælp tassaassaaq qallunaatut oqaaseqanngitsut qallunaatut ilinniarnerminni saniatigut ikiuutitut atorsinnaasassaat, pingaartumik oqariartaatsit kiisalu oqaatsit qanoq eqqortumik taaneqartarnissaat pillugit.

c) Suliat allat killiffii ilisimatitsissutigineqarput, tassani aatsitassarsiornermi taaguutit pillugit suleqatigiissitaliornissamik inuttassat inissinneqarsimaneri, qaammatillu naanerani naapitinniarnissaat nalunaarutigineqarpoq.

Ilinniusiorfimmit nunap assingi nassiunneqarsimasut misissoqquneqarsimasullu pillugit CCO naqqiissutissaasunik

amigaataasunillu tunngasunik oqaaseqarpoq, ilanngullugu oqaatigaa nunat aqqinik katersineq naammassilluariarpat Oqaasileriffik immikkut susasaqartunut attuumassuteqartunullu qaaqqusiumaartoq.

CCO Nunani Avannarlerni oqaatsitigut suliniutit pillugit kiisalu Nordisk Ministerrådip ataani inissisimasut qanoq inissinnialneri aningaasatigullu qanoq inissisimaneri pillugit ilisimatitsivoq. Tamanna nunatta peqataatinneqarneranut pitsaannginnerusumik sunniuteqarsinnaanera aamma eqqaavaa. Decembarip aallartilaarnerani Stockholmimi ataatsimiinnermi tamakkua saqummiunneqartussaasut ilisimatitsissutigaa.

2. Kingullermik ataatsimiinnermit imaqarniliap akuerineqarnera. Taamaatillugu akuerineqarpoq.

3. Saaffiginnissutit.

a) Ilinniusiorfimmit uumasunik sukumiinerusumik taaguusiisarnissaq ujjartorlugu saaffiginnittoqarpoq. Matumani pineqarpoq taaguutit soorlu imaattut: nuarluit ilaat, assagiarsuit ilaat il.il. immikkut ittumik taaguuteqarnissaat ujjartorneqarpoq, taamaammat Oqaasiliortut siunnersuutigissavaat tamakkuninnga suliaqartut namminneerlutik siunnersuusioqqullugit, Oqaasiliortunullu isummerfigisassanngorlugit. Taamaliortoqanngippat piffissaq sivisuallaq uteqattaarinnermut atorneqalersinnaammat.

b) Krydssubsidiering

Saaffiginnissummut tunngatillugu subsidier nalakkersuisut ingerlatsivinnut ikiorsiissutaanik taaneqarsimasut ilisimatitsissutigineqarpoq. Matumani saaffiginnittup nassuiaanera malillugu una naleqquttutut aalajangiunneqarpoq:

amigartooruteqartunut ikiorsiineq.

c) Oqaatsit naanerinut apeqqut. Ilagisaavimik pappiliartaavimillu oqartarnerit sumiorpaluutaanersut meerarpaluutaanersullunniit apeqqutigineqarpoq.

Matumani saaffiginnittoq nassuiaassinertalimmik akineqassaaq inuusuttut akornanni tusartarsimasai tassaasinnaasut inuusuttut namminneerlutik akunnerminni oqariartaasiliussimasai. Taamatut inuusuttut oqaatsinik pinnguarlutik iliortarnerat sumiluunniit tusarsaasarpoq, naak ilaatigut namminneerlutik kukkusumik oqalunnertik ilisimasaraluarlugu. Kisianni tassa sumiorpaluutaasimanngippat taamatut atueriaaseq eqqortuunngitsoq aamma ilisimatitsissutigineqassaaq. Oqaasiliortut allattaatsimut tunngavinnik aammalu oqaatsit qanoq allanneqartassanerinnik malittarisassaliortarput, taakkualu tamanit malinneqartussaataasut

aamma ilanngullugu erseqqissaassutigineqassaaq.

d) Naalackersuisoqarfiup taaguutaanik apeqquut
Avatangiisinut Silallu Pissusaanut Naalackersuisoqarfik pillugu
apeqqutigineqarpoq kukkusuumnginnersoq, tassami silamut
naalagaasoqarsinnaanngimmat, kisianni Oqaasiliortunit
nassuiaatigineqarpoq taamatut taaguuseeriaatsimi manna
pineqartartoq, ass.: Avatangiisinut Silallu Pissusaanut TUNNGASUNIK
Naalackersuisoq, kisianni taanna oqaaseq 'tunngasunik'
ilanngunneqartanngilaq, taaguutinili taamatut paasisariaalluni.

e) Ordbogimut tunngasumik saaffiginnissut
Tunumiut sumiorpaluutaannik tunngaveqartumik ordbogiliorneq
pillugu suliaqataasoq Oqaasiliortunut saaffiginnippoq
ataatsimeeqatiserinnilluni. Tassani oqaatigaa ordbogi oqaatsinut
assigiinngitsunik tallimanik (Tunumiutut, Kitaamiutut, danskisut,
tuluttut franskisullu) imaqartoq, aammalu ukiut marluk qaangiuppata
saqqummersussaamat taanna pillugu ataatsimeeqateqalaarumavoq.
Oqaasiliortut taamatut saaffigineqarnerminni oqaatigaat
kikkulluunniit ordbogimik suliaqarsinnaatitaanerat ataqqillugu,
taamaattorli kalaallit oqaasii sumiorpaluutaalu pineqartillugit
allattaatsimut tunngasumik malittarisassat tamanut atuuttussat
pillugit avaqqunneqarsinnaannginnertik unnerlugu. Taamaattumik
Oqaasiliortut ordbogiliorneq suliaqatigiit tamarmiusut
ataatsimeeqatigerusuppaat, tamannalu decembarip qiteqqunnerani
pisinnaassappat ajorinagu.

f) Piniarnermi taaguutit
Qasigianguani katersugaasivimmiit saaffiginnissut piniarnermi
taakkunungalu sakkut taaguutaannik ilisimatitsissutigineqarpoq.
Taaguutit pineqartut suliarineqareerpata Oqaasiliortunut
takutinneqassapput saaffiginnittumullu nassiunneqarlutik.
Oqaasiliortunit aamma oqaatigineqarpoq John Møllerip
Atuagagdliutitoqqani piniarneq pillugu allaaserisaa
atorneqarsinnaassasoq.

g) Autismep taaguutaa pillugu
Autismep kalaallisut nassuiaataa 'avammut matoqqasoq' pillugu
saaffiginnittup iluarinagu allappoq.
Oqaasiliortut nassuiaatigaat taamani taaguutit suliarineqarnerini
tamakkuninnga ilisimasallit suliaqatigineqarsimasut. Nutserisoqarfiup
oqaatsinik allattorsimaffiutaani autisme aamma ima

nassuiarneqarsimavoq: nammineq silarsuaaqqaminiittarneq, avatangiisit isiginngitsutut illugit periuseqartarneq. Taakkua naatsumik oqaatigalugit tassaapput matoqqaneq, soorluttaaq aamma oqaatsip autismep naggua autos taamatut isumaqartoq, nammineq aallaaviginermik imaqartoq.

Saaffiginnittoq qanoq nassuiaateqarusukkaluarnersoq aperineqassaaq, sunalu tulluarnerusutut isigineraa aamma Oqaasiliortut tusassallugu soqutigaat.

h) 2/3 kalaallisut taaneqarsinnaavoq pingajorarterutaanni marluk, imalt.pingasuugaangata marluk. Tassani oqaaseqatigiinni suut/kikkut pineqarnersut apeqqutaapput.

Brande Grønland som den reneste natur ima nutserneqarsinnaasoq Oqaasiliortut siunnersuutigaat:

Kalaallit Nunaat/Nunatta mingutsinneqannginnerpaatut nittarsaannera.

Betalingsbalance kalaallisut: akiliisinnaassuseqarneq
den enkelte borgers betalingsbalance: innuttaasut akiliisinnaas-
suseqarnerat

4. Taaguutit allat ullormut oqaluuserisassanut ilanngussat makkuupput:
gymnasial uddannelse – ilinniarnertuunngorniarneq
grundforløb – tunngaviusumik ilinniagaq
studieretning – ilinniakkatigut sammivik
obligatorisk studieretning – ilinniagaq pinngitsoorneqartussaanngitsoq
niveau – killiffik
frivilling undervisning – nammineq ingerlatamik ilinniarneq
andetsprogspædagogik – ilitsoqqussarinagit oqaasilinnut ilinniartitse-
riaaseq
anvendelsesorienteret – atuinissamut sammisut/atoriaannagassatut
sammisat
teoretisk – atugarsorneq
IT – IT, qarasaasiarsorneq
studiemetodik – ilinniarnermi periaatsit
fælles grammatisk terminologi – oqaasilerissutini taaguusersuutit
ataatsimoorussat
fjernundervisning – alisissumit ilinniartitsineq
lærerteam - ilinniartitsisoqatigiit
teamlærer – ilinniartitsisoqatigiit ilaat
tutorordning – ikorfartuisoqarneq
merit – naammasseriikkat nuutat/nuunneqarnerat
kulturfag – [ilinniartitsissutit] kulturimut tunngasut
science – science, uumaatsulerineq

elevcentreret undervisning – atuartumik qitiutitsineq
teamlærersamarbejde – ilinniartitsisoqatigiinni suleqatigiinneq
undervisning af udsatte elever – immikkut atuartittarialinnik atuartit-
sineq
pædagogisk inspector – atuartitsinermik nakkutillineq

Inussiarnersumik inuulluaqqusilluta
Carl Chr. Olsen
Siulittaasoq

Katti Frederiksen
Allatsi